

SEZIONE POESIA SARDA INEDITA "ANTONIO SANNA"

-Primo Premio-

SA CANTONE DE SA MELAGRANADA

Misteriu soberanu de sa melagranada
ue prenda 'e risu est lampu 'e malasorte
cale Deus imperiosu at innaltzadu
cussu tronu de alvure fioridu
pro ti ponner in conca sa corona
de reina de vida e de morte?

Dae pighe de traschìa alvréschida de lughe dae
nie de sas laras su fogu de s'amore
dae s'ispina 'e sa rosa sa lagrima de rughe dae
su lizu de versu lugore de cantore.
Eppuru - ahi dilemma fabulosu!
- eo no isco cale manu 'e Arcanzelu
-dindalò... pitipiti...- orizèit cun cresura
de alenu sa Janna 'e Paradisu
a palas de Lusbè chi a ficcas fattas
a manu manca forroja forroja
isbambarreit intragnas d'Isprofundu
in ora isventurada cando luna
e sole ana sa chiza de calvone.

Melagranada tue appentu 'e oro
girat su mundu dae sero a manzanu
girat in tundu umpare a su coro
che una murrocculedda 'e lande
muinende dae punzu giogulanu
ispaccada ses bisu 'e Paradisu
e in laras su piantu torrat risu
cun Chelu isteddadu in pianta 'e manu.

Rellozu metafisicu ue sun remonidos
imbentos de ora 'e dies e de seculu
e siendas de colores chi an sentore
de diligos ammajos de amore
che chiterra de femina cun carignos de sonos
e ses puru orjolu de istrallobios
d'oroscopu de naschida de morte e fatturias
lòrumu sapientziale de Pitagora

- su numeru est lughe de su lùmine
sèmene d'antiga sabidoria -.

E como in custa nostra era impelciada
che carru'e cannittu cun boes corros in ludu
cando a nanos in giae supplican Giudeos
chi ana paralùmine de omines
a pes de su budrone iscarenadu
fintzas de s'usureri istratzabbertulas

como in s'interinadolzu de custa vida mia
frades mios carrales de laudes de poesia
prima d'essere mortu essende biu
lassademi cust'untza 'e bonistrina...
su tempus nesi 'e poder carignare
da indignu Cireneu sos pius de chentu ranos
de su Rosariu 'e sa melagranada.